

Gereja Methodist Damansara Utama Disita?
mStar Online
Ogos 12, 2011
Oleh HAIRULAZIM MAHMUD

PETALING JAYA: Khabar angin kononnya Gereja Methodist Damansara Utama, Seksyen 13 di sini yang diserbu Jabatan Agama Islam Selangor (JAIS) baru-baru ini akan disita kerana tidak memperoleh kelulusan Majlis Bandaraya Petaling Jaya (MBPJ) tersebar luas pada Khamis.

Bagaimanapun, para wartawan dan jurugambar media yang memenuhi kawasan sekitar gereja itu sejak pukul 12 tengah hari hingga pukul 3 petang tadi hampa apabila operasi yang dikatakan itu sebenarnya maklumat palsu.

Tinjauan *mStar Online* mendapati aktiviti di bangunan yang menggunakan nama Pusat Impian itu berjalan seperti biasa dengan orang ramai keluar masuk berurusan di dalam premis berkenaan.

Tiada kelibat penguat kuasa MBPJ kelihatan.

Sumber MBPJ memberitahu, tiada perancangan untuk menyita premis itu setakat ini.

"Tiada perbincangan oleh pihak kami untuk menyita premis itu sehingga kini," katanya di sini.

Minggu lepas, penguat kuasa JAIS menyerbu gereja berkenaan selepas mendapat maklumat bahawa terdapat orang Islam turut menghadiri majlis di gereja berkenaan.

Ketika serbuan dilakukan kira-kira pukul 9 malam, kelihatan seseorang sedang berucap diselitkan perkataan al-Quran dan terdapat bukti kegiatan cubaan memurtadkan umat Islam.

Berpandukan kepada siasatan awal mereka yang terbabit boleh didakwa mengikut Seksyen 10 Enakmen Jenayah Syariah 1995.

Isu tersebut menjadi kecoh apabila Menteri Besar, Tan Sri Abdul Khalid Ibrahim campur tangan dan menggesa JAIS mengemukakan laporan penuh kepada kerajaan negeri berhubung serbuan yang dilakukan oleh pihak penguat kuasa jabatan agama itu.

Hakcipta Terpelihara © 1995-2011 Star Publications (Malaysia) Bhd

Source: http://mstar.com.my/berita/cerita.asp?file=/2011/8/12/mstar_berita/20110811135841&sec=mstar_berita